

lis Gnovis

■ GURIZE. Un destin straordinari

«Dal filo spinato al filo della storia» al è il titul dal XVIII «Forum internazional de Euregion aquileiês», ideât de clape culturâl «Mitteleuropa» e programât dai 28 ai 30 di Setembar. Il confront internazional al sarà logât a Udin, miercus, e a Triest, joibe (cu la session «Mitteleurope: cetantis capitâls, un destin unic»); e a Gurize, vinars (cul dibatiment su «Lesperience dal Gect Go e de Capitâl europeane de culture Go! 2025»). La decision di proclamâ Nova Gorica e Gurize «Capitâl europeane de culture 2025», al marche il president di «Mitteleuropa», Paolo Petizion, e à di diventâ «ocasion uniche e no ripetibil par recuperâ chê straordinarie funzion d'incontri che tant la gjeografie che la storie i àn assegnât impretebilmentri a chest cjanton d'Europe».

■ PORPÊT. Mestri di scuele e di vite

Il grop teatrâl «Vecjo Friûl» di Porpêt, cul jutori dal Cumon, al organize la presentazion dal libri «Con il paese nel cuore / Decio Bragagnini, maestro di scuola e di vita». Su l'opare, dedicate al innomenât e preseât paisan, ch'al fo ancje volontari de «Caritas» diocesane, al fevelarà il curadôr, Ferruccio Tassin de Deputazion di Storie patrie pal Friûl. La convigne e je stabilide vinars ai 30 di Setembar, a 18 li de sale civiche di Porpêt (te strade Don Minzoni 6). Par insiorâ l'apontament, a cjantaran «I Cantôrs de Plêf», direzûts di Flavio D'Agostini, e Tiziano Dri al presenterà lis vetrinis cui imprescj di marangon dal nono Pieri Dri.

■ TARVIS. Boscs par simpri

E tire a di lunc insin ai 30 di Setembar la campagne «Fsc Forest Week 2022», nassude par «educâ e informâ i consumadôrs sui vantaçs de certificazion e sun cemût che «Fsc» e lis aziendis certificadis a son daûr a meti in vore la mission di «Forests For All Forever». «Fsc» al è il sisteme di certificazion da la gjestion sostenibil dai boscs plui innomenât e plui doprât tal mont, cul fin di garantî beneficis ambientâi, sociâi e economics tant pai proprietaris e pai operadôrs boschifs che pai consumadôrs di legnam e di chei altris prodots e servizis ufierts dal bosc.

■ LION. Mosaics dynamics e tridimensionâi

Li dal Istitût talian di culture di Lion, in grazie dal Fogolâr, de «Maison des Italiens» e di «Friuli nel Mondo», fintremai ai 28 di Setembar, si à podût rimirâ la mostre «I Mosaics dynamics e i colori: opere di Giulio Menossi», con 13 oparis dal artisan-artist di Udin inscuclât a Milan, li de buteghe di Domenico Colledani. La specialità di Menossi a son i mosaics dynamics e tridimensionâi, svilupâts seont l'impostazion dal Neodecorativism. L'artist furlan, invidât in France su la ferade dai champions de Scuele di Sequals (Mora, Facchina, Odorico, Patrizio...), al à lavorât in Sardegna, in Tanzania, in Turchie e te Patagonie.

■ UDIN. I obietifs de sostenibilitât

Tal lûc internet <https://2022.festivalsvilupposostenibile.it/>, si po proponi ancjemò altris apontaments par insiorâ il program de edizion pal 2022 dal «Festival dal svilup sostenibil», inmaneât di «Asvis», l'Aleance taliane pal svilup sostenibil, ch'è cure l'aplicazion ancje in Italie dai 17 obietifs de «Agjende 2030» des Nazions unidis. La plui grande manifestazion de Societât civil taliane su lis cuistions de sostenibilitât e sarà programade dai 4 ai 20 di Otubar.

Miercus 28 S. Venceslau martar

Joibe 29 S. ts Arcagnui G.M.R.

Vinars 30 S. Jaroni

Sabide 1 S. Taresie dal B. Jesù

Domenie 2 XXVII Domenie vie pal an

Lunis 3 S. Gjerart

Martars 4 S. Francesc di Assisi

Il timp Si sbassin lis temperaduris



Il soreli

Ai 28 al jeve aes 7.01 e al va a mont aes 18.53.



La lune

Ai 3 Prin cuart.

Il proverbi

Clap che si môf nol fâs muscli.

Lis voris dal mès

Tirait jù lis ultimis verduris vanzadis, tant che cucins, carotis e pevarons. Traplantait ai e cevolis, semenait bledis, ardielut, rucule e valariane.

La culture de bielece

Ai 2 di Otubar, la «Filologjiche» e fâs il congrès anuâl

Tal an che la gloriose «Scuele Mosaiciscj dal Friûl» e finis 100 agns, ancje la «Societât Filologjiche Furlane», daspò dal Ent «Friûl pal Mont», e à stabilît di celebrâ a Spilimberc il so congrès.

La XCIX edizion de convigne anuâl e je programade par domenie ai 2 di Otubar, cuntun program culturâl ch'al larà indevant di 9 di buinore, cuant che pre' Italo Gerometta al cjantarà Messe, li dal domo, compagnât des corâls «Tomat» di Spilimberc, «San Marc» di Pordenon e dal domo di Vençon, fin dopomisdì, cuant che si podarà visitâ i tesauris artistics e religjôs de vile dal Friûl occidental e i ambients de «Scuele Mosaiciscj», guidâts dai esperts (che si varà di prenotâ a lis direzions: 0432 501598 o info@filologicafriulana.it).

La part centrâl de manifestazion e tararà a 10.30, li dal teatri «Miotto», dopo dal benvignût in place cui sbandieradôrs e cui tamburins di Spilimberc.

Finîts i salûts dai sorestants e dal president de «Filologjiche», Federico Vicario, a saran proponûts doi intervents. Federico Lovison al fevelarà su «Spilimberc. Secui di beltât intune antighe vile de Patrie». Angelo Bertani, po, al presenterà «Italo Zannier e Nane Zavagno protagoniscj dal art, fra



Spilimberc tune fotografie di Pietro De Rosa

A Spilimberc, in onôr e in favôr de «Scuele Mosaiciscj dal Friûl»

fedeltât a lis lidris e internazionalitât». La matinade dal congrès e finissarà cu la presentazion dal Numar Unic «Spilimberc», curade di Gianni Colledani e di Marco Salvadori.

Il «gustâ social» tai ambients de vile dal mosaic al sarà riservât ai socis che si saran prenotâts, par telefon o par pueste eletroniche (doprant chês stessis direzions pes visitis guidadis).

Il congrès dai 2 di Otubar al sarà compagnât di altris trê manifestazions. Vinars ai 30 di Setembar, e colarà la premiazion dal concurs leterari «Zâl par furlan», rivât a la none edizion; la cerimonia e tararà a 20.30 li dal cjsiel. Il prin di di Otubar, a 18.30, palac Ta-

dea i darà acet al spetacul «Melodiis populârs furlanis te reinterpretazion d'autôr e jazz», cun musicis di Zardini, di Pezze, di Perosa, di Garzoni e di Venturini eseguidis dai grops corâi «San Marco» di Pordenon e «Tomat» di Spilimberc e di Anna Mindotti (vôs), di Nevio Zaninotto (sax) e di Davide de Lucia (piano).

L'ultime «Manifestazion pal Congrès» e sarà chê di martars ai 4 di Otubar. A Taurian, la «Somsî» e la «Filologjiche» a tornaran a proponi, a 20.30, il Numar Unic «Spilimberc», cu la presentazion di Gianni Colledani e di Marco Salvadori.

Mario Zili



Spilimberc. Une fieste lungje un an

Vie pal mès di Otubar, il program di manifestazions inmaneât par celebrâ il centenari de fondazion da la «Scuele Mosaiciscj dal Friûl» (1922-2022) al propon altris doi apontaments. Ai 13, il Museu dal veri di Muran al curarà la convigne «Mosaico & Vetro», a 10.30, in colaborazion cu la Fondazione «Musei Civici di Venezia». Ai 21 di Otubar, li dal teatri «Miotto» di

Spilimberc, cun «Folkest», al sarà programât a 18.30 l'apontament «Dominico Bianchini ditto Rossetto, un friulano musicista e mosaicista nella Venezia del Cinquecento». Il lunari di dutis lis celebracions al è publicât tal lûc internet de Scuele internazional di Spilimberc, a la direzion: <https://scuolamosaicistfriuli.it/eventi/>.

Tradizions furlanis dal mès par cure di Mario Martinis

SANT MICHÊL

Ancje la fieste dal arcagnul Michêl, protetôr dai Langobarts, che a introduserin in Friûl la sô devozion, si inlidrisâ une vore in Friûl par vie de sô fortunade posizion tal calendari de nature e des oparis agrariis. Di fat, di là de grande impuartance che Sant Michêl al à te simbologie religiose tant che custodi dal ecuinozi de Sierade, o ben tant che entitât angeliche de lûs che e lote cuntri lis fuarcis firmant dal mâl che a cressin cul lâ jù dal soreli tal firmament, chest sant al è diventât ancje suee juridiche e agrarie. Cussî ae fin dal mès di Setembar, cuant che si fiesteze l'arcagnul Michêl (29-IX) in Friûl al tacave il timp des vendemis e des racuelts e si sieravin i conts de stagion dai arments za lâts jù a val in ocasion de fieste de Nativitât de B. V. Marie (8-IX). Cu la fieste di Sant Michêl, po, si sierave la stagion dai pascui libars tes armentarezis e tai pascui comunitaris, tacade cun Sant Zorç (23-IV). Come ducj chei altris sants metûts in ponts strategjics dal calendari, Sant



Michêl al è diventât ancje un riferiment meteorologic, tant che segnaladôr des variazions climaticis che a capitin dongje dal ecuinozi. Di fat, tor dai 29 di Setembar dispès si à un fuart burlaç («la montane di Sant Michêl») che al sbasse une vore la temperature de cjalde atmosfere dal ultin Astât, puartant cun decision il timp de Sierade, plui fresc e cristalin. Sant dal ecuinozi dal Atom, Michêl al marche ancje il scurtâsi des zornadis (un proverbi al ricuarde che Sant Michêl (29-IX) al impie il ferâl e Sant Josef (19.III) lu distude) e che lis cjustinis a son prontis (A Sant Michêl la cjustine tal fossêl) par cjapâls sù e jemplâ la ceste (A Sant Michel o vin la montane e la cjustine te tamane). Te economie dal mont agrari di une volte la raculte des cjustinis e jere une vore impuartante no dome inte mangiative (si lis mangjave rustidis o bulidis, speladis e lessadis cun orâr) ma ancje pal barat: la int di culine e di mont e scambiave lis cjustinis cul forment e la blave de planure.